

www.BibleForChildren.org



Jon 14



Wal Jisas bin dalim im wekinmen olabat na, “Yumob nomo wandi bradin en nogudbinji. Yumob garra trastim God, en yumob garra trastim mi du, dumaji main Dedi garram loda rum deya langa im kemp, en ai garra go en meigim det pleis redi blanga yumob.”



“Ai nomo bina dalim yumob dijan if im bina laiyawan stori. Bat im nomo laiyawan stori. Im trubala. Ai garra go en meigim det pleis redi blanga yumob, en afta ai garra kambek en gajim yumob miselp en deigim yumob blanga jidan weya ai garra jidan.”



Wal mi na, Jon, mi braja blanga yumob. Wi ol meit gija langa olkain trabul weya kaman langa wi, dumaji wi bilib langa Jisas Krais.

Nomeda trabul kaman langa wi, bat stil wi garra




go thru langa detlot trabul en nomo slekap, dumaji Jisas Krais im Bos blanga wi.



Wal mi jidan prisana iya langa dijan lilwan ailin
gulum Petmos. Deibin pudum mi iya, dumaji
aibin oldei tokabat God wed en dalimbat


ola pipul det gudnyus
blanga Jisas Krais.




Wal streidawei det Spirit bin teikoba langa mi, en deya langa hebin aibin luk wan speshal boswan tjeya, en sambodi bin jidan ontop langa det speshalwan tjeya.




Brom deya aibin lisiin ebrijing weya jidan laibala bin
sing. Ebrijing langa hebin en ebrijing langa ola kantri
en ebrijing insaid langa solwoda en
ebrijing langa det spiritmob, ol
detlot na aibin lisiin olabat sing, . . .




... “Langa det sambodi hu oldei jidan langa det speshal boswan tjeya, en langa det yangwan ship, wal langa det dubala na wi garra gibit theingks, en wi garra preisim dubala. Wi garra lukbek langa dubala en meigim dubala haibala, dumaji dubala brabli strongbala olagija.”



En aibin luk det nyubala kemp gulum Holi Taun.
Tharran na det nyubala Jerusalem, en imbin kamdan
brom God deya langa top. Imbin jis laiga yanggel wen
im redi blanga midim im pramis.




Brom deya aibin lisiin sambodi bin jingat adbala brom
det speshalwan tjeya, “God garra jidanbat rait langa
midul langa ola pipul na. Im garra jidan garram olabat,
dumaji im Bos blanga olabat, en olabat blanga im.
God imself garra jidan garram olabat, en im garra
meigim
olabat
gudbinji.”




Brom deya det einjul bin shoum mi det riba deya, en det riba bin abum det woda blanga laif. Det woda bin brabli klinwan. Jis laik glas imbin jidan. En det riba bin kamat brom det speshal boswan tjeya blanga God en Jisas Krais, en det riba bin go rait langa midul langa det bigbala roud deya langa det taun.



En det san en mun dubala kaan gibit lait langa det taun, dumaji God imself det lait blanga det taun. En Jisas Kraiss im lait blanga det taun du.



Nobodi kaan bringimap enijing nogudwan insaid langa det taun, en enibodi hu oldei dumbat nogudbala ting en oldei dalimbat laiya kaan gowin langa det taun. Oni detlot pipul hu garram olabat neim deya langa det buk blanga Jisas, langa det Buk Blanga Laif, oni olabat na garra gowin insaid langa det taun.



“God imself garra jidan garram
olabat, en im garra meigim olabat
gudbinji. Dei kaan kraikrai na.
Nobodi kaan dai. Nomo enijing
kaan ardibat enibodi. Ol detkain
ting binij na. Det olbalawei im
binij.”




Wal yu kaan faindim enijing weya God nomo lau langa det taun. En det graun weya God bin meigim adwan longtaim nomo deya du, dumaji det speshal boswan tjeya blanga God en Jisas Krais im deya insaid langa det taun, en ola wekinmen

blanga God garra weship im deya du.


Detlot wekinmen garra luk im feis, en dei garra abum im neim langa olabat forid, en dei garra jidan boswan garram im olagija.



Brom deya aibin luk ola dedbala pipul bin gidap na. Detlot pipul hubin dai langa solwoda en detlot pipul hubin dai langa graun bin ol gidap. Detlot dedbala langa ola spirit pleis bin gidap du. Holot ola dedbala pipul bin gidap, en deibin ol jandap lida langa det speshalwan waitwan tjeya. Sambodi bin opinimap ola buk na, en deibin opinimap det najawan buk du. Det buk dei gulum Buk Blanga Laif. Wal deibin jadjim ol detlot dedbala pipul na.



Deibin luk langa detlot buk, en deibin faindim ebrijing weya detlot pipul bin dumbat deya langa detlot buk, en deibin panishimbat olabat blanga ol detlot ting weya deibin dumbat. Deibin peiyimbek ebribodi blanga wanim deibin dumbat. Wal deibin luk langa det buk gulum Buk Blanga Laif blanga ola neim blanga detlot dedbala pipul weya deibin jadjim olabat, en if dei nomo bin faindim olabat neim deya, binij. Deibin tjakam olabat langa det bigbala faiya du.



Det Spirit blanga God en det pramis blanga Jisas,
dubala dalim Jisas, “Yu kaman na!” En ebribodi hu lisiin
langa dubala tok lagijat garra tok lagijat gin, “Yu kaman
na!” En if enibodi thestibala, en im wandim det woda
blanga laif, wal im gin gajim, dumaji det woda im friwan.



God bin laigim ebribodi detmatj, en
imbin jandim im ronwan san blanga dai
blanga olabat, wulijim ebribodi hu bilib
langa im garra abum det olagijawan
laif en nomo dai. En mi na det
San blanga im.



Romans 3:23

En ebribodi garra ol yusum det wanwei blanga jidan raitwei langa God, dumaji ebribodi bin dum nogudbala ting, en nobodi jidan hau God wandim olabat blanga jidan.

Romans 6:23

Yumob sabi na? Wen enibodi bulurum det nogudbalawei, det nogudbalawei peiyim im jis laiga wekinmen. Bat det pei oldei meigim im dai. Bat wen enibodi bulurum Jisas Krai, God oldei gibit im det olagijawan laif friwan thru Jisas Krai det Bos blanga wi.

Hibrus 9:27

Yu si? Ebribodi garra dai wantaim, en afta God garra jadjim olabat.



Ifishans 2:8,9

Wal God bin seibum yumob wen yumob bin bilib langa Jisas Kraiss dumaji imbin abum det brabli kainbala filing blanga yumob. Im nomo bin seibum yumob dumaji yumob bin gudbala, en im nomo bin seibum yumob dumaji yumob bin dum gudbala ting. Imbin seibum yumob dumaji imbin wandi seibum yumob imself, en dumaji imbin seibum yumob lagijat, wal nobodi kaan reken miselp na.

Romans 10:9,10

En if enibodi jandap lida langa ola pipul en tok, “Jisas Kraiss im Bos,” en if im bilib langa im hat brabliwei God bin meigim Jisas Kraiss gidap laibala brom dedbala, wal God garra seibum im, dumaji wen enibodi bilib langa Jisas Kraiss, God meigim im jidan raitwei langa im, en im seibum im dumaji im tok, “Jisas Kraiss im Bos.”



Jon 3:16,17

“God bin laigim ebribodi detmatj, en imbin jandim im ronwan san blanga dai blanga olabat, wulijim ebribodi hu bilib langa im garra abum det olagijawan laif en nomo dai. En mi na det San blanga im. En im nomo bin jandim mi langa dijan wel blanga pudum bleim langa pipul. Imbin jandim mi langa dijan wel blanga seibum pipul.

Fes Jon 5:11-13

Wal iya na det wed blanga God. Im tok God bin gibit wi det olagijawan laif, en im San na det olagijawan laif. En enibodi hu garram im San garram det olagijawan laif. En detlot pipul hu nomo garram im San nomo garram det olagijawan laif. Wal aibin raidimbat dijan leda langa yumob pipul hu bilib langa Jisas Krais det San blanga God, en aibin raidimbat dijan leda blanga meigim yumob sabi brabliwei yumob garram det olagijawan laif.



Jon 14; Sekan Karinthiyans 5;
Rebaleishan 4, 21, 22

Storyline by: Edward D. Hughes

Illustrated by: Lazarus
and Alastair Paterson

Adapted by: Sarah S.

Kriol Bible (rop) © 2019, Wycliffe Bible Translators, Inc.
All rights reserved.

<https://live.bible.is/bible/ROPWYI/GEN/1>

©2026 Bible for Children, Inc.

www.M1914.org

www.bibleforchildren.org

